

**KERATAN AKHBAR-AKHBAR TEMPATAN
TARIKH: 19 JUN 2015 (JUMAAT)**

Bil	Tajuk	Akhbar
1	Kajian kesan gegaran gempa bumi perlu di bekas lombong Mamut - Ewon	Bernamea.com
2	Hakisan dilereng Gunung Kinabalu dijangka jika hujan berterusan	Bernamea.com
3	Gempa bumi lemah skala 4.0 skala richter berlaku di Ranau pagi ini	Bernamea.com
4	Gempa bumi sederhana landa Halmahera di Indonesia	Bernamea.com
5	Gegaran ketiga melanda Ranau	Sinar Harian
6	Palm oil prices ' set to rise'	The Star



Kajian Kesan Gegeran Gempa Bumi Perlu Di Bekas Lombong Mamut - Ewon

KUNDASANG, 18 Jun (Bernama) -- Satu kajian kesan gegaran gempa bumi perlu dilakukan di kawasan bekas lombong Mamut Ranau, **kata Menteri Sains, Teknologi dan Inovasi Datuk Dr Ewon Ebin.**

Sehubungan itu, anggota Parlimen Ranau itu meminta agensi berkaitan khususnya Jabatan Mineral dan Geosains Sabah melakukan kajian tersebut.

Beliau berkata kajian ditumpukan jika terdapat rekahan pada dinding bekas lombong Mamut yang mempunyai kira-kira enam juta gelen air.

"Jika berlaku rekahan pada dinding lombong itu akan mengakibatkan bencana yang teruk kepada 20,000 penduduk dari 40 kampung yang tinggal di kawasan sekitar," katanya kepada pemberita selepas melawat tanah runtuh di Kampung Masilau dan Pusat Pemindahan di Mini Dewan Kundasang, di sini hari ini.

Lombong tembaga Mamut kini berstatus tanah negeri setelah pajakan lombong seluas 1,942 hektar kepada Syarikat Mamut Copper Mine Sdn Bhd (MCM) tamat tempoh pada 15 Feb 2003.

Dalam perkembangan lain, Ewon berkata beliau akan mencadangkan kepada kerajaan Persekutuan untuk membina sebuah loji rawatan air yang baharu di Ranau.

Ini kerana, katanya loji rawatan air sedia ada di Liwagu mendapat punca sumber air mentah tidak berkualiti dari sungai Masilau Kundasang.

Beliau berkata terdapat aktiviti pertanian penanamam sayur di kawasan tersebut dan penggunaan racun serangga mengalir ke sungai Masilau.

Ewon berkata kawasan cadangan pembinaan loji rawatan air itu terletak di sungai Mokodao iaitu 20 kilometer dari Pekan Ranau.

Katanya pembinaan loji rawatan air akan dapat mengatasi bekalan air terawat di Ranau sekiranya loji rawatan air sedia ada di Liwagu tidak dapat digunakan seperti yang berlaku pada masa sekarang, menyebabkan bekalan air terawat di daerah itu terputus.

-- BERNAMA



Hakisan Di Lereng Gunung Kinabalu Dijangka Jika Hujan Berterusan

KOTA KINABALU, 18 Jun (Bernama) -- Hujan diramalkan berterusan sepanjang Ramadan ini akan menyebabkan hakisan di lereng Gunung Kinabalu dan membawa batuan, tanah dan kayu mengalir ke lembah, lurah dan sungai, kata Ketua Bahagian Sumber Mineral, Jabatan Mineral dan Geosains Sabah Jontih Enggihon.

Beliau berkata hujan berterusan akan lebih memburukkan keadaan terutamanya di kawasan yang berhampiran sungai.

"Hakisan itu akan membentuk aliran lumpur yang membawa beribu tan tanah dan batu berat yang bergolek akan menghakis tebing dan dasar sungai seperti yang berlaku di Sungai Liwagu dan Mesilou," katanya kepada Bernama ketika dihubungi Khamis.

Jontih berkata penduduk di sepanjang sungai terdedah kepada bahaya akibat hakisan tebing kesan daripada hentakan kuat daripada serpihan yang dibawa oleh banjir lumpur.

Menurutnya, keadaan itu adalah fasa selepas gempa yang berlaku dan boleh menyebabkan kehilangan nyawa sekiranya tindakan wajar tidak diambil.

Namun, beliau berkata Jawatankuasa Bencana Daerah bersama agensi-agensi berkaitan telah mengambil langkah berjaga-jaga dengan memindahkan penduduk ke kawasan yang lebih selamat bagi mengelak daripada sebarang kejadian yang tidak diingini berlaku.

Semalam, Jabatan Meteorologi meramalkan Sabah akan mengalami kekerapan hujan sepanjang Ramadan ini yang akan menyebabkan tanah runtuh dan banjir kilat.

Suhu di Sabah sepanjang Ramadan juga diramalkan 31 hingga 33 darjah Celsius dengan kadar taburan hujan antara 200mm hingga 300mm.



Gempa Bumi Lemah 4.0 Skala Richter Berlaku Di Ranau Pagi Ini

KUALA LUMPUR, 18 Jun (Bernama) -- Gempa bumi lemah berukuran 4.0 pada skala Richter berlaku di Ranau, Sabah pada pukul 5.58 pagi tadi.

Menurut kenyataan yang dikeluarkan Jabatan Meteorologi pada Khamis, gegaran hanya dirasai di kawasan Ranau.

Gegaran kali ini adalah yang ketiga melanda kawasan itu sejak semalam.

Semalam, dua gempa bumi lemah dicatatkan berlaku di Ranau iaitu yang pertama berukuran 2.5 pada skala Richter pada pukul 11.51 pagi, diikuti gegaran kedua berukuran 3.4 pada skala Richter pada 6.12 petang.

Pada 5 Jun lalu, gempa bumi berukuran 5.9 pada skala Richter melanda Sabah menyebabkan 18 orang terkorban dan memusnahkan harta benda.

-- BERNAMA

**BERITA ONLINE
BERNAMA.COM
TARIKH: 19 JUN 2015 (JUMAAT)**



Gempa Bumi Sederhana Landa Halmahera Di Indonesia

KUALA LUMPUR, 18 Jun (Bernama) -- Gempa bumi sederhana melanda Halmahera, Indonesia pagi ini, demikian menurut Jabatan Meteorologi Malaysia.

Menurut kenyataan jabatan itu Khamis, gempa berukuran 5.3 pada skala Richter berlaku pada 9.45am pagi kira-kira 244km di timur laut Ternate, Indonesia dan 1,126km di tenggara Semporna.

Bagaimanapun, ia tidak membawa ancaman tsunami, kata kenyataan itu.

-- BERNAMA

